

東

華

錄

東華錄卷之十九

湘源蔣良騏千之父

康熙四十二年

丁未朔

正月壬子羣臣請預行慶賀

萬壽恭進鞍馬緞匹等物

上諭曰爾等如此進獻在外督撫必効之朕必不受朕素嗜文學諸臣有以詩文獻者當留覽旣而諸臣恭進慶祝萬壽屏復以屏文繕寫冊頁進呈得

旨留冊頁卻屏 十六日壬戌

上巡視南河 庚午過濟南府幸巡撫署觀珍珠泉

御書三度齊河郎事詩一章懸署門

觀趵突泉

御書源清流潔額懸泉上潤物額懸珍珠泉學宗洙泗懸  
省書院

上登泰山駐蹕泰安州免經過地方四十一年未完錢糧  
四川巡撫貝和諾疏言各省教職每學二員獨川省有  
五十七學各設一員請于威茂等州敘州府會川等衛添  
設訓導一沭江等縣添設教諭一凡姓司學添設教授一  
從之 二月

上駐蹕長清縣界首鋪夜大風南村失火延燒民舍侍衛  
海青等率眾撲滅之翌日上諭巡撫王國昌率司道等察  
火燬房屋居民人數賜銀散給

上由宿遷縣五花橋渡中河遍閱堤工至宿遷縣渡黃河  
明日遍閱徐家灣等堤祥符等閘復細閱新修河口登舟  
遍閱堤工 巳卯自桃源縣登舟遍閱河堤

御舟入清口泊天妃閣 壬午駐蹕揚州府城內 甲申

御舟渡江登金山江天寺書動靜萬古額懸寺中 丙戌

駐蹕蘇州府城內 戊子登舟 庚寅駐蹕杭州府城內

癸巳自杭登舟回鑾 乙未登陸駐蘇州 戊戌自蘇

州登舟啓行 辛丑自京口由陸路幸江寧府駐蹕城內

壬寅遣大學士馬齊祭明太祖陵 癸卯自江寧回鑾

至鎮江避風館登舟泊金山寺 三月四川巡撫貝和諾

疏言前撫臣于養志題明松潘小河疊溪三處收捐米穀

分貯備用自三十八年迄今松潘捐一千七百餘石其小

河疊溪以道路險峻輸運維艱等赴捐納請停止收貯例

允之 丁未登岸閱高家堰堤工及各處堤工 巳酉登

舟歷黃河南岸觀龍窩烟墩等堤復渡黃河閱九里崗等

堤 已未自楊村登岸駐南苑 庚申回宮 以淮黃淮  
成頒詔天下恩款三十八條 四月

上發出熊賜履呈覽明神宗熹宗以下吏書四本諭曰明  
時太監皆及見之所以彼時之事知之甚悉太監魏忠賢  
惡跡史書僅記其大畧而已猶未詳載也此書所載楊漣  
左光斗死於北鎮撫司獄中聞此一人係在午門前受御  
杖死太監等以布裹尸出之至於隨崇禎殉難者乃太監  
王承恩因此

世祖章皇帝作文致祭並立碑碣此書載太監王之心後

死明係錯誤尋賜履等復行詳察果係王承恩非王之心  
遵旨改正至於左光斗楊鏈察考諸書俱云死於北鎮撫  
司獄中故照彼書書之

上諭大學士等曰李光地簡任直隸巡撫以來每年雨水  
調順五穀豐登官吏兵民無不心服今吏部尙書缺出卽  
令補授仍管直隸巡撫事 廣西巡撫蕭永藻疏言粵西  
僻處邊陲徭獠雜處而南寧太平慶遠思恩四府地接交  
夷兼轄土州縣司崗寨五十餘處尤爲難治前經九卿議  
定四府所屬官員缺出選擇桂林平樂等府品級相當者

調補三年俸滿陞用惟南太慶思四府廳州縣共二十九員桂林平樂等五府知縣以上共五十八員當奉行之始尙有久任之員可以選擇迄今一十六年除調補叅劾升任病休外多係任事日淺才守未知卽日久任者亦係循分供職與選擇調補之例不符前撫臣彭鵬于調補各員恐以地方之美惡爲趨避酌一掣簽之法實屬至公嗣後四府官員缺出應仍以五府內之廉能者掣簽調補如無可調之員請旨特簡補授部議從之欽點正考官大學士熊賜履吏部尙書陳廷敬副考官吏部侍郎吳涵禮



部待郎許汝霖 授一甲進士王式丹爲修撰趙晉錢名  
世爲編修汪灝查慎行何焯蔣廷錫吳廷棫陳邦彥傅有  
德汪文炯陳世倌吳瞻淇汪份潘體震賡謨陸乘鑑涂天  
和萬經陳徐基朱書林祖望俞樾宋至章蘂功伊泰楊緒  
劉巖王邁馬汝爲西庫王居建劉圻吳連趙徵介謝履忠  
單喬年耿古德劉祖任趙泰臨王士鑰董泰楊萬程李天  
祥蔣肇阿進泰吳相李士和季堂鄭爲龍才住萬氏欽四  
十九人改庶吉士 六月

御書闡道醇儒額命懸景州董仲舒廟 七月山東巡撫

王國昌疏言新泰等州縣復被水災請將倉穀百二十餘萬石並應運漕米十餘萬石平糶但倉穀不便久懸仰祈聖慈暫開事例以實倉貯至動用漕米擬將康熙四十二年以後俸工捐補部議平糶銀于次年秋收後買穀還倉所捐俸工令該地方官發買籽粒牛隻助民耕種其請開事例處無庸議先是

上以巡視河工過濟南軫念東省去歲被災降旨蠲免錢糧並命總督桑額以漕米二萬石交總河張鵬翮選員運赴濟寧兗州等屬平糶加賑桑額另運米二萬石于泰安

一路協濟至是國昌疏報桑額所運米遵 旨散給河臣

張鵬翮亦委員運米到東隨即酌撥各屬並動用常平倉穀二十八萬石請于俸工分年捐還奉

旨朕前諭桑額張鵬翮各將漕糧二萬運東賑糶此扈從諸臣所共聞者今觀王國昌所奏將常平倉收貯米穀俱行糶賣散給與朕原諭不符王國昌又稱捐康熙四十二年官員俸資衙門工食賠補似此何時方能完結此項米穀應令速行賠補貯倉尋命遣官截留漕米五十萬石並派八旗官員各領帑銀三千兩馳赴山東會同地方官

賑養饑民以侍郎穆和倫辛保卞永譽分三路巡察

上諭大學士九卿等曰朕因山左災荒勞心殫思屢行諮  
詔歲歉非止令歲爲然地方官歷年隱匿不報今春朕因  
閱視河工親見災黎情形始行籌畫賑濟今歲田禾尙有  
薄收之處巡撫布政使爲伊等素有久缺欲巧圖完補故  
甚其詞以奏報又賞綠科道紛紛急奏言人民相食私糞  
或開事例或撥銀兩因于其中侵蝕託言賑濟而實欲完  
補虧空以施鬼域之謀今京師遣往三路人員惟視巡撫  
等所指地方賑濟應將此事交三路大臣加意稽察時布

政使劉曜內陞國昌疏留御史顧素劾國昌匿灾同劉曜  
開事例補虧空請賜罷斥上諭王國昌不過一謹愿人朕  
會詢問李光地張鵬翮伊等亦言國昌在任並無劣蹟惟  
劉曜乃一能巧匪人將國昌任意驅使甚易事耳此事著  
同前諭九卿之旨一併議奏會議國昌應革職得旨姑  
留任尋部臣以國昌等擅動常平倉穀請催令賠補詔  
傳詢擅動之由同張鵬翮分賠諭大學士等曰朕聞山東  
巡撫將賑濟饑民官員賁去銀兩俱收藩庫迄今猶未散  
給如此則賑濟饑民之事不致遲悞乎此銀俱自京師發

往並非伊等庫內之項且前往賑濟人員係八旗佐領公  
舉殷實才能之人王國昌等僅可查其養饑民之優劣其  
銀錢耗費與否係賑濟官員之事與伊等何涉而將此銀  
兩收貯至今仍不散給此係何心朕所不解是又劉噉之  
詭計也况派去三百餘人俱留濟南必致米價騰貴人皆  
受困可將朕旨交該部移問王國昌等尋國昌回奏巡察  
大臣辛保等先後開賑因查極次貧民分別賑養稍稍時  
日疏下部議以國昌于被灾時不卽令州縣官查明極次  
貧民分別造冊移送致巡察大臣藉此推諉應行議罪

旨革任 八月湖南鎮總兵紅苗作亂偏沅巡撫趙申喬同

提督俞益謨疏請發兵征勦又奏言臣與督臣喻成龍令

衡永道張仕可賁檄赴鎮總兵苗洞爲先撫後勦之計其歸

順苗民已得二十餘寨 檄粵黔楚三省提督會同進勦

貴州提督李芳遠奉詔移兵會勦深入苗地平橋塘山

葫蘆天星諸寨 遣尙書席尔達副都統圖思海徐九如

率荊州駐防兵會勦 十月自龍椒洞至天星寨分路搜

勦斬馘千餘降其寨三百餘移辰沅道駐鎮其地

諭曰近征紅苗貴州提督李芳遠親冒砲銃鼓衆力戰進

斫數寨間偏沅巡撫趙申喬亦甚強毅也

上西巡肥鄉縣武生李正朝病狂衝哭儀仗直隸巡撫李  
光地奏請治罪因劾順天學政楊名時濫取狂生請勅部  
議處得 旨楊名時自督學以來賦性乖異縱有精于學

業工于文章者但係殷實之人必不錄取其無產赤貧雖  
不能文或記誦數語亦得進學理應從重治罪現今年歲  
未滿又無賂賣生員之事從寬恕宥 盛京禮部侍郎哈

山疏言臣部所役網戶採牧校尉等八百二十五人內無  
力婚娶者百六十餘此等人役因無室家往往不務生計



巡避官差請發盛京戶部銀四萬兩依照公庫例派員經理一分生息以六年爲期本還戶部可得息銀二萬八千餘兩陸續給與無妻壯丁完娶銀人五十兩仍將餘銀生息久遠有益下部議從之 湖南布政使施世綸以衡州府之安仁嘉禾臨武永州府之江華寶慶府之城步及郴州之桂陽靖州之通道天柱向止訓導一員請添設教諭又永定銅鼓二衛止設教授綏寧會同二邑止設教諭俱請添設訓導勅部議行 丁酉幸太原府 庚子自太原啓行 十一月丙辰幸西安府園武設宴上特召西安協

領額稜特近 御座前親賜之飲諭曰尔父宣力行間尔亦由兵丁効力以至協領故親賜飲以示異于眾尋遷西安副都統調荊州副都統 癸亥自西安回鑾 十二月壬申朔駐蹕河南府城內 庚寅

上還宮 令補授外官簽掣所得地方如隔原籍在五百里以內者雖隔省亦著令迴避永爲例

康熙四十三年正月諭曰朕前遣侍衛至鉄索橋掛匾還京回奏彼處督撫餽銀六千餘兩夫一侍衛而費至此則凡部院司官筆帖式等差遣往來者又不知煩費幾何矣

二月兩江總督阿山疏劾江西巡撫張志棟計薦不公  
舍清廉素著之九江知府朱儼品行素優之彭澤知縣吳  
士鉉而舉居官平常之袁州府同知馬斌貪縱不法之南  
昌知縣王廷對擅自定稿且致書屬勿改易事下部議張  
志棟與布政使李興祖按察使劉廷機及道府等官俱革  
職阿山尋疏言李興祖劉廷機等呈辦大計舉劾皆係張  
志棟隨其喜怒任意增刪並非司道附和請予開復于是  
給事中許志進疏劾之曰阿山與張志棟意見乖違具疏  
題叅部議以舉荐不公將兩司以下一同革職阿山復爲

藩司李與祖臬司劉廷機道員韓象起等題請開復竊以  
僥倖之端不可開欺詐之風不可長張志棟傲慢自恣其  
計冊舉劾司道等當時瞻徇不言事後違例置辯謂無賄  
賂請託誰其信之若倖邀開復則勸懲之重典止屬虛文  
賞罰之大權不難假借督臣操縱自如恩威已出將來人  
盡効尤顛倒是非變亂黑白弊端百出其害難言乞勅嚴  
究情弊以昭法紀疏下部察議議未上阿山疏辯許志進  
所劾誣妄且許志進係淮安漕標營卒之子素行不端誓  
爲張志棟報仇許志進又追論阿山徇庇張四教及收局

員賄賂盜賣倉穀弗問貪淫惡跡審虛縱妾父招搖生事  
諸款並下部察議部議許志進因許奏逞忿臚款應革職  
阿山妄請開復司道等官被言官糾劾不靜听處分瑣屑  
許奏應行革任

上命阿山仍從寬留任餘依議

上諭大學士等近日各省學臣其中不肖之徒惟利是圖  
總不知愛惜人才其根源在禮部科道督撫皆有規禮故  
無敢直言之人又聞世督浙江學政文志鯨將考試二三  
等生員竟有加杖責者日文志鯨身係翰林特簡之使提督

學政乃如此暴戾可乎 三月川陝督博濟言臣等會勘  
黃河三門中流爲神門水勢甚溜南爲鬼門水更洶湧北  
爲人門水勢稍緩三門之下百餘步爲底柱再下二里有  
卧虎灘臣等用船載糧三十石從卧虎灘牽挽上過人門  
但溜急灘多所有截留豫省漕糧撥運陝西不如陸路之  
便得 旨會議 兩廣總督郭世隆疏海面遶濶賊匪易  
于潛踪臣設立船兵自南澳至龍門令守備千總把總逐  
日帶領巡哨副將叅將遊擊每月會巡一次水師總兵春  
秋二季駕船二十分巡外洋至瓊州上年十一月至今

二月先後擊敗賊衆于沱寧外洋沉賊船七斗頭角海面  
沉賊船十瓊南萬崖三虎海面沉賊船二 四川巡撫具  
和諾疏言川省行塩潼川中江山路崎嶇艱于陸運額引  
壅滯難消惟冰江小溪水運可通請增給水引商民交便  
下部議行 給事中黃鼎楫湯右曾許志進宋駿業王原  
等合疏劾直隸巡撫李光地曰去歲直隸報災州縣二十  
餘處撫巡撫李光地疏內或稱開倉賑濟或稱減價平糶  
務使民沾寔惠臣等竊計直屬百姓自必安撫有方不致  
流離失所乃近見河間飢民散入京畿者甚多皇上曲軫

民依特令八旗王貝勒滿漢大臣設廠數十處分行賑濟  
李光地身爲撫臣漫無經理疏內所稱民沾寔惠俱屬空  
言尤可異者寧津縣被災更重流亡更多皇上至聖至明  
無微不照特勅撫臣前往察勘而光地去歲竟不報災僅  
于題叅知縣陳大經疏內稱寧津頗有木災匪重爲輕並  
不將人民逃散情形據寔陳奏

聖恩高厚不加譴責復

諭光地選賢能官員將河間飢民領還原籍仍給籽粒不  
致他徇失所而光地目擊流亡不聞出一籌畫碌碌素餐



徒以虛文巧飾若非

皇上宵旰憂勤多方拯救止恃光地之撫綏則流散之民不將盡填溝壑乎光地身膺重任上荷

聖主之殊恩不能報稱萬一視民生之疾苦罔知拊循臣等合詞糾劾請嚴加處分以爲大臣膜視民生之戒疏下光地回奏光地奏去歲河間府屬被水勘明成災州縣三十餘處陸續照例題請蠲免錢糧分別災傷輕重將倉糧散賑出借又設立義廠二十餘處自去歲十一月起至今未停無論遠近飢民貧民皆許就食其流散者飭地方官

分道招令還鄉臣安敢稍涉懈怠以負

皇上委任然安集無術猶有貧民如許散入京城此臣及  
地方官之罪無可辨者也至寧津地方先經知縣陳大經  
以去年大半豐收僅有低窪一百鄉村被淹不照例申詳  
被水輕重乃以合縣田禾通算謂不及成災竟不通報及  
十月中臣扈

駕西巡由真定回署路過天津縣人民詢知情形卽劾罷  
陳大經疏中聲明寧津頗有水災乃老病廢職由報不時  
撫恤無實是臣劾陳大經原因其報災不時撫恤無實非

專劾其老病所云頗有水灾者亦是臣詢訪所得情形非  
敢匿重爲輕也其時卽飭知府及署知縣煮粥賑濟加意  
招徠然人旣不能悉歸本業致有流移臣與地方官之罪  
又無可辭也臣上荷

殊恩不能報稱誠如科臣所云乞

嚴賜處分以儆庸祿以重畿輔臣不勝悚惶待罪疏入得  
旨不必引咎光地又奏臣謬膺直撫重任五年之內恭荷  
皇上指誨幸免過愆並無功績去年四月仰荷特恩補授  
吏部尙書仍當直撫事臣自知非分夙夜戰兢果然福極

禍生遂逢災青去秋所屬河間等處遭罹水淹寔臣政無  
善狀之所致臣雖極力拯救而安插無術以致貧民流移  
入京上厯

聖懷不卽治臣之罪諭令委官招回原籍無廢農務臣跪  
讀之下恭繹

聖言寬大和平而微臣循省思咎終宵達旦懷恨不復欲  
生臣本庸才遭逢恩盼錫賚迥出尋常臣之罪戾亦宜從  
重處分以爲叨蒙尸位者戒况六官首職難以久虛九列  
崇班從無兼領臣今若惧罪隱忍不言則厚顏覲面不獨

外無以視吏民且內無以對妻子伏乞天恩另簡賢能補授吏部尙書使臣落職帶罪効力郊圻窮思畢精以贖愆過庶心稍安而分可盡疏入

上諭大學士等曰李光地著留任其居官有何可議但彼專信門生常爲所誑凡人口講道學彼卽深信之夫道學豈易言哉孔子曰先行其言而後從之入之品行必始終不易朕始信之若徒託之空言而無實事則亦何益之有非特此也凡有職任者一有所爲善惡立見更不宜輕言也 四月詔賑山東流民之就食京師者以議政大臣佟

國維內大臣明珠監賑

已卯上幸髻髻山

貴州提督

李芳遠疏言貴州苗民襍處控制尤在得人保題武職請  
照文員例以久任苗地熟悉風土之人揀選生名題補送  
部引見待 旨李芳遠提督岩疆居官甚優訓練兵丁俱  
極精勇所奏武職事如所請行 七月兩廣總督郭世隆  
疏言粵東至南澳起經碣石鎮至虎門協海面二十餘里  
守汛遼濶請增設兵船于遙對南澳之澄海協以資巡防  
海門一所最爲緊要應移達豪營遊擊守備千總把總駐  
劄改爲海門營以海門所守備移爲達濠營守備甲子一

所乃險要海口從前止設千總一員應以鎮左營移駐與  
碣石鎮聯絡防守吳川營隔海百餘里有碣州一島宜以  
龍門協所屬之乾休營兵令白鴿寨守備千總把總統之  
駐劄碣州改爲碣州營白鴿寨卽以千總管領至平海大  
鵬二所逼近巨海應專設二營其順德一鎮外有香山鹿  
門二協內有省會駐防兵可裁去總兵官止留遊擊爲順  
德營改鎮標左營爲平海營右營爲大鵬營下部議均如  
所請行 八月御史呂履恒劾奏李光地千秋審之事促  
意斷決

上以光地依律奏擬並非任意斷決命發還呂履恒奏  
給事中王原劾奏文選司郎中陳汝弼因光地舉荐由刑  
部調吏部初猶矯詐顧名近則專擅恣縱有婪贓情弊下  
都察院察議革汝弼職交刑部鞫訊刑部定讞計贓論絞  
上曰人有荐陳汝弼之賢能者故朕簡于眾郎中內特授  
選司如受賄是實卽置之干法以爲眾戒若未經受賄則  
應寬之令再審尋覆奏受賄有據應請立絞

上察知供証非實下議政大臣九卿等確核得刑訊選人  
逼供行賄狀奏上



上命免陳汝弼罪原審諸臣降革有差主原以有囑托私書爲陳汝弼舉首革職兩廣總督郭世隆疏言前奏添造戰船俱經報竣設立船兵自南澳至龍門令守備千總把總逐日帶領巡哨副將叅將遊擊每月會巡一次水師總兵春秋二季駕船二十分巡外洋至瓊州按季更替以次川巡據報先後擊敗賊衆于沱寧外洋沉賊船六斗頭角海面沉賊船一瓊南萬崖二處海面沉賊船二得

旨嘉獎 九月侍衛拉錫等探視河源回奏臣等于四月初四日自京起程五月十三日至青海十四日至呼呼布

拉克六月初七日至星宿海之東有澤名鄂陵周二百餘里鄂陵西有澤名札陵周三百餘里二澤相隔三十里初九日至星宿海蒙古名鄂墩搭拉登高山視星宿海之源小泉萬億不可勝數周圍羣山蒙古名爲庫爾滾卽崑崙也南有山名古尔班吐尔哈西南有山名布胡珠尔黑西有山名巴尔布哈北有山名阿克搭因七奇東北有山名烏蘭杜石古尔班吐尔哈山下諸泉西番國名爲噶尔馬塘巴尔布哈山下諸泉名爲噶尔馬春穆郎阿克塔因七奇山下諸泉名爲噶尔馬沁尼三山之泉流出三支河卽

古尔班索羅謨也三河東流入扎陵澤自扎陵澤一支流入鄂陵澤自鄂陵澤流出則黃河也除此他山之泉與平地之泉流爲小河者不可勝數盡歸黃河東下臣等自星宿海于六月十一日回程向東南行二日登哈尔吉山見黃河東流至呼呼托羅海山又南流繞撤除克山之南又北流至巴尔托羅海山之南次日至水山之西其山最高雲霧蔽之蒙古言此山長三百餘里有九高峰自古至今未見未銷終日雲霧蔽之常雨雪一月中三四日晴而已自此回行十六日至席拉庫特又向南行過僧庫

里高嶺行百餘里至黃河岸見黃河自巴尔托羅海山向  
東北流于歸德堡之北達喀山之南從兩山峽中流入蘭  
州自京師至星宿海共七千六百餘里寧夏之西有松山  
至星宿海天氣漸低地勢漸高人氣閉塞故多喘息十  
月免浙江山東二省康熙四十四年分應征地丁銀米  
諭大學士等戶部呈樣之斛斗升朕俱注水詳加測量其  
樣升上下四角寬窄不勻算積數見方得三萬一千三百  
八十二分有零其樣斗上下四角寬窄亦不勻積數見方  
得三十一萬六千七百六十四分零其樣鉄斛算積數見

方得一百六十萬分其數不相符查性理大全嘉量篇第  
十二內每斛積一百六十二萬分與今之鉄斛較多二萬  
分因鉄斛用之已久不可輕改是以依今之鉄斛五斗爲  
準造新樣斗一具方徑八寸深五寸積數見方得三十二  
萬分又造新樣升一具方徑四寸深二寸積數見方得三  
萬二千分若依此樣十升一斗五斗一斛毫釐不差因出  
新樣銅斗升赴部以鉄照式爲之

十一月丁酉朔日有食之

上諭大學士等曰凡人皆當立品筮仕之初卽思于請於

人其立意如是則他日又將何所望哉或有未仕之先生  
已積負盈積至入官後若不賸民何以償之國家名器豈  
爲此輩償債設乎 十二月湖廣巡撫劉殿衡疏陳四事  
一招墾荒地捐納牛種荆襄鄖陽等處荒地甚多宜聽民  
開墾六年升科其無力自脩牛種者應令湖北文武官捐  
資給與每荒地一頃給銀十兩次年按額起科計所墾地  
畝銀數酌與各官議敘一零星錢糧請就民便以碎銀制  
錢輸納一修築堤埝應照堤內田糧均派沿江地畝隄岸  
鱗次大小不一總以自護田廬緣修築等役豪強規避前

督臣郭琇奏定照糧夫役原指隄內之糧有司奉行不善  
均之閭閻致隄外之民以害不切已而不甘赴役隄內之  
民以分任有人而誤于觀望請嗣後就各隄內按糧均派  
修築一挖壓田內地應估價均補湖北安陸荊州江水滿  
急年久之隄必須靠築月隄其築隄基址及所取之土皆  
有碍于附堤田畝應丈明畝數估定價值以保護隄內民  
田均攤補償業主疏下部議碎錢制錢不准折收餘如所

請

東華錄卷之十九終

東華錄卷之二十

湘源蔣良騏千之父

康熙四十四年正月諭工部前黃河往往倒灌清口者由仲莊閘與清口相對駱馬湖水勢湍急逆逼黃河倒灌清口朕躬臨相度命移仲莊閘改建于楊家莊出口河臣報稱黃水暢流入海絕無倒灌清口之患朕今欲特蒞其地籌善後之規其中河黃河運河有應加修防者亦隨宜指示至于山東省並于沿途親行周覽焉 二月御史黃秉中疏言科道官出滿洲漢軍陞補者大抵積俸二十餘年



漢人一爲知縣俸滿三年行取到部卽得考選科道殊覺  
太驟請嗣後行取知縣先以六部主事用俟練習有年始  
許考選

上閱奏諭大學士等曰昨御史黃秉中條奏行取知縣卽  
以科道用未免太過滿州漢軍俱從郎中員外始升科道  
漢人則以行取知縣卽升實屬不均交九卿詹事科道會  
同確議尋議如所請行 癸酉

上南巡啟行駐南苑明日于張家灣登舟 甲午 御冊  
泊濟寧州 浙撫張泰交疏請幸兩浙允之 三月庚子

入江南境 壬寅渡黃河泊清江浦閱楊家莊等處隄岸

開口 癸卯駐淮安府 乙巳泊揚州府城北高橋 戊

申駐蹕江天寺 辛亥駐蹕蘇州府城內

上萬壽節召河督張鵬瀚諭曰朕至清口見黃水倒灌因

以問尔尔反称不會倒灌此卽尔毫不認錯處尔居官雖

好却爲王謙張弼所欺李光地居官亦好但聽信楊名時

虛僞道學之言往往誤事又諭曰尔自謂一介不與一介

不取一介不與則有之一介不取則未必然取與不取惟

尔自知之曩者直隸歲歉巡撫沈朝聘曾奏民食粗糲故

臣亦食粗糲朕謂之日尔食粗糲不過在百姓面前耳若在署中豈亦然耶卽果食粗糲不能有濟民生有何益哉  
己未駐蹕松江府城內貢生孫銳等奏稱清浦之北地名孔宅自漢時至聖苗裔避地至此因名賜

御書聖跡遺徽匾額 四月甲子朔泊嘉興府 丙辰駐蹕杭州府城內

命掌院學士揆敘考試浙江舉貢生監等詩字以顧祖雍顧寧遠二人記名 庚午移駐西湖行宮 癸酉

上登舟回鑾 戊寅 命揆敘考試蘇州等府舉貢生監

詩字記王泰來等五十三人名 甲申

上登陸幸江寧府 乙酉駐蹕城內考試江寧舉貢生監

詩字記錢榮世等五人名 庚寅自江寧啟行過明太祖

陵自東角門入 諭曰非尔等導引有秩派朕之敬心耳

辛卯駐蹕江天寺行宮 癸巳幸高家堰遍閱河堤

丁酉回宮 五月吏部題原任大學士吳璥員缺得

旨舊例大臣病故必俟其靈柩還籍方請補授乃國家眷

念大臣之意今吳璥尚未發引何亟亟乃尔 六月李光

地疏劾革職雲南布政司張霖假稱奉 旨販賣私鹽得

銀百六十餘萬兩得旨卽令李光地審擬霖論斬家產籍沒入官

上諭吏部曰李光地居官甚好才品俱優授尙書年久着陞爲文淵閣大學士調河南巡撫趙宏燮爲直隸巡撫七月山西巡撫噶禮疏言河東修築堤堰原以保護鹽池舊例工力物料無不責之民間未免苦累若專責之商亦恐僱覓人夫輾轉貽悞請令商人出料民人出力庶使民無置料之費商免雇覓之累下部議行先是潞安知府員缺噶禮以霍州知州李紹祖保題補授及紹祖使酒自

別噶禮匿不以奏至是上聞命大學士九卿議罪擬革

噶禮職旨從寬降二級畱任又御史劉若鼐疏劾噶

禮貪婪無厭虐吏害民計贓數十萬兩知府趙鳳詔爲噶

禮心腹專用酷刑以濟貪壑下噶禮回奏尋噶禮以奏辯

得釋兩江總督阿山疏劾河寧知府陳鵬年以妓樓改

建講堂褻瀆聖諭及貪酷二款命會同漕運總督桑額

河道總督張鵬翮審擬鵬年論斬監候特旨令陳鵬年

來京在修書處効力吏部議覆嗣後應將行取知縣到

部引見後以各部主事挨班補用遇考選時方准考選至

初任之中行評博亦俟伊等陞任後始准考選科道考選時將正途出身之六部郎中員外生事中行評博及翰林院編修檢討一同開列聽候簡用雍正八年丁酉朔京師地震十一月大學士等以鄂羅斯貿易來使貢至原文繙繹之文進呈上閱之諭曰此乃喇提諾托多烏祖克鄂羅斯三種文也外國文亦三十六字母者亦有三十字五十字者朕交喇嘛詳考視之其來源與中國同但不分平上去聲而尙有入聲其兩字合音甚明中國平上去入四韻極精兩字合音不甚緊要是以學之者少漸至

棄之問翰林院四聲無不知者問兩字合音則不能知中國所有之字外國亦知之特不全耳 太學士等以蠲免湖廣錢糧上諭進呈

上問曰曾查此數年蠲免錢糧數目否馬齊等奏曰自康熙四十二年以來蠲免一千六百餘萬

上曰自吳三桂變亂之後民甚艱苦故朕累年蠲免錢糧民生優裕則國家太平矣爾等可查康熙元年以來所免錢糧總數來奏 尋奏查自元年以來所免錢糧共九千萬有奇報聞 十二月



翰林大學士等曰今年順天鄉試聲名不佳人或怨其不公  
又閱試卷未加圈點者甚多應試者各執落卷以示人又  
作草人至試官家門首砍之觀其舉動人怨殆不可言矣  
朕在避暑處點汪霖姚士藹爲正副考官以爲出人意科  
朕親手封發當不復生弊矣由此觀之亦不在此但存乎  
其人之所行而已科場之設以爲選擇人才之地丁此事  
而行之不正雖學問優長何益之有科道官專在言職何  
不叅劾可將此問科道官 尋議考官汪霖姚士藹照例  
職例革職永不敘用從之

康熙四十五年正月九卿議覆兩江總督阿山等疏言黃  
淮運三河工事閔重大請聖駕親臨指示應如所請並屢  
次疏請俯從不允 二月二十七日丙辰京師地震

三月順天府尹施世綸疏陳四款一禁五城司坊壇理詞  
訟一禁奸徒包攬捐納一禁牙行要佔貨物一禁流娼歌  
宴勅部議行著爲令 兩廣總督郭世隆疏報海洋巨盜  
蔡王也等聚眾劫掠商船今已擒獲分別定擬斬流得

旨遣刑部侍郎常綬往勘覆奏蔡王也等五人應立斬部  
議世隆平時禁賊不嚴及事發又朦朧掩飾應革職 旨

從寬留任上親定殿試卷一甲三名不合式十一卷令再  
三年殿試其文理謫劣二人閔仁明黜革馬芝秀仍留場  
人又張勿我郭璜二人亦皆黜革詳陳延敬奏會元尙  
居易首篇一千二百餘字文亦不佳向來作文不得過六  
百五十字所作違例應黜革從之考官獲罪有差 四月  
授庶吉士王誥等爲編修檢討其徐天相謝履忠馬汝爲  
柯喬年萬民欽李天祥劉圻楊緒萬經胡相李堂劉祖任  
王邁朱書伊泰西庫才任高其偉董泰何焯文義荒疏不  
佳授職再教習三年盛度阿進泰耿古德文字俱劣不堪

造就着革職

上諭兵部曰國家綏靖疆圉安輯軍民惟專閫元戎是賴  
如有實能久鎮邊境茂著勞績者則獎勵酬庸宜逾常格  
貴州提督李芳遠自歷行間二十餘載屢立戰功及莅事  
黔省馭軍有法訓下知方威望愈聞謀猷益殫現今舊將  
閱歲之久罕與比倫用沛殊恩特彰優異著加太子少保  
授爲鎮遠將軍以示朕褒寵勞臣至意 先是湖廣總督  
石文晟劾奏容美土司田舜年私造宮殿暴虐奸淫種種  
不法舜年叅革伊子田朋加假捏明如幼子田翼南年歲

希圖承襲並劾桑植土司向長庚容匿噶如抗不解審六  
月

上命內閣學士二格偕左都御史梅鋗赴楚會同石文晟  
等鞠之時舜年赴武昌申訴文晟拘之尋病卒長庚亦解  
晒如聽勘九月會鞠梅鋗石文晟各就一議具奏二格以  
証佐未集獄辭未定不便立議疏言晒如長庚已到案取  
供至田舜年各款僅取族姪田瑛姻供詞梅鋗等俱欲以  
現取口供完結臣以爲瑛如與舜年同被獲之人非舜年  
子弟伊親子及案內証佐二十餘名無一到者未經質審

處甚多舜年治病之醫及檢屍之知縣洪國輔俱未到案  
舜年死未明白尙草率完結無以服衆土司心 旨總督  
石文晟原叅田舜年建造宮殿行兇作惡是以羈留武昌  
今田舜年已故又具奏欲息其事如土司抗拒不法則當  
發兵征勦若無罪當反坐原叅之人朕意以爲二格所奏  
爲是此事不便令督撫提督會審當再遣大臣前往尋命  
太學士席哈納侍郎張廷樞肅永藻察審田舜年僭越淫  
縱各款俱虛其希圖承襲等事屬實應治罪已死無庸議  
田昞如暴戾虐民抗不赴審已革職仍枷責安插內地以

其所屬戶口收入版圖向長庚隱匿田畝如降四級畱任  
並以草率具奏梅鎔革職總督石文晟及湖北巡撫劉殿  
衡偏沅巡撫趙申喬提督余益謨各降級罰俸有差 川  
陝督博濟疏言去歲秋時奉 諭旨念民間所用升斗大

小不同令部臣較鑄平準頒行臣已照式鑄造轉發各屬  
但陝甘收糧舊用永豐倉斗駐防兵糧亦以此支放相沿  
已久令以部頒新斗較量一石計短少三斗如以新斗收  
受卽以新斗放給則十分之中已減三分兵馬糧料不無  
艱窘况陝甘兵馬較他省最多倘有行走全賴士飽馬騰

查收受民糧時尙有多收耗糧一項未革請將此項耗糧  
永行禁革百姓交糧令照舊斗之數以新斗交收支給兵  
糧亦照舊斗之數以新斗量給則耗糧革絕民已樂輸恐  
後而陝甘滿漢十餘萬兵丁俱仰沐格外之恩矣下部  
議如所請其永豐倉升斗永行停止 七月平遙民郭明  
奇等以山西巡撫鳴禮縱庇貪婪知縣王綬赴巡視南城  
御史袁橋呈控袁橋以聞並列欵入奏一通省錢糧每兩  
案火耗銀二錢除分補大同臨汾洪洞襄陵翼城臨晉聞  
喜崞縣長治介休諸處虧帑外入已銀共四十餘萬兩



指修解州祠宇用巡撫印簿分給通省勒捐入已一縱令汾州府同知馬遵夢賍分潤一令家伶赴平陽汾州潞安三府勒取富民饋送銀兩一因詞訟索臨汾介休富戶亢時鼎梁湄銀兩一納孝義知縣杜連登賄題調淇洞及連登以貪婪被揭復曲加庇護指稱訪聞列款輕叅一隱匿平定州雹傷不報請 旨究賍治罪下噶禮回奏會山西學政鄒士琰代太原士民疏畱噶禮御史蔡珍疏糾士琰職在衡文借命題交結撫臣朋比營私漸不可長且袁橋疏于七月十八日甫經奉旨是月二十日太原士民何以

卽行具呈顯係誣捏噶禮與士璫同城委爲不知是惜情  
也知而不阻是倖 恩也並請勅部議處尋噶禮回奏以  
郭明奇等屢經犯案脫逃赴京誣告並奏袁橋蔡珍以無  
憑之事誣陷狀下九卿詹事科道察奏郭明奇等交刑部  
治罪袁橋蔡珍以誣奏褫革降調有差士璫降級開仕  
御史黃秉中疏言各部院具題事件奉有諭旨必由內閣  
發科抄然後施行惟綠頭牌摺子口傳 諭旨卽行不由  
內閣不發科抄日後無從查考請嗣後于奉 旨遵行後  
卽錄原卷並所奏 諭旨移送內閣封呈 御覽如偶有

銷悞 勅令更正俱發內閣登記以備稽核又欽奉清字  
諭旨各衙門諱漢奉行恐字句亦有未符宜令原奏官  
員送內閣繕譯遵照傳抄疏入下部確議部臣以事涉繁  
瑣煩費難行議上 旨凡口傳諭旨及緣頭牌摺子啟奏  
事件著名衙門于每月終彙開奏覽 九月雲貴總督員  
和諾疏報擒獲逆匪李天極王枝葉等于富民縣之響哨  
山李天極者昆明人冒入廣通縣學與臨安府生員朱六  
非造爲符籙以師宗州生員之子魏枝葉流蕩不歸誘之  
詭托明桂王之孫陽以王姓相呼遇開化府賣藥人楊春

榮蒙白縣談相人張平山富民縣演伎人楊起鳳同謀不  
軌僞稱文興三年以鉛募柱王之寶及諸僞印散播總制  
大將軍副總兵都督僉事等僞劄願入黨者改裝蓬頭僧  
或長髮道士潛期先掠廣南次掠開花由蒙自劫省城爲  
首標弁兵首報先後擒獲李天極王枝葉楊春榮楊起鳳  
張平山朱六非請 旨立斬餘黨流徙數人首報者獎賞  
如例 十月

諭大學士等前遣護軍統領席住等擒假達賴喇嘛及第  
巴妻子時諸皇子及諸大臣俱言一假達賴喇嘛擒之何

爲朕意以眾蒙古俱傾心歸向達賴喇嘛此雖係假達賴喇嘛而有達賴喇嘛之名眾蒙古皆服之倘不以朝命前往擒之若爲策妄阿拉布坦迎去則西域蒙古皆向策妄阿拉布坦矣故特遣席住前去席住方到其地果有策妄阿拉布坦令人來迎以此觀之若非遣人前往則假達賴喇嘛必已歸策妄阿拉布坦矣至西域回子及蒙古今衰弱已極欲取之亦甚易但併其地不足以耕種得其人不足以驅使且現今伊等已俱恪守法度是以不取此等情事漢大學士及九卿等俱未深悉可將朕諭示之 免山

西陝西甘肅汀蘇安徽浙江江西湖北湖南福建廣東各省自康熙四十三年以前未完地丁銀二百一十二萬二千七百兩有奇糧十萬五千七百有奇其直隸山東積欠錢糧今年俱已捐免

十一月

諭大學士等曰噶爾丹遇我軍于克魯倫之地未嘗交戰乃往西路遇西師進擊盡被殺戮西路兵獲其牛羊二十餘萬甚爲得濟此乃天意也昔吳三桂兵圍永興城危在旦夕矣三桂一死其兵皆退此亦天意也 十二月內閣九卿等奏請

聖駕閱視溜淮套工程得

旨朕年已漸增憚于臨幸尋會議據原任兩江總督阿山  
及督修都統孫渣齊等各奏必得

皇上親歷河干面授方畧則奠定之功可立成

上奏奉

皇太后懿旨允之時諸臣詳勘地形請于溜淮套別開河  
道使水直達張福口以分淮勢事關創建故冉三陳請云  
康熙四十六年正月二十二日

上南巡閱河啟行 二月壬寅

御舟泊清河縣運口是日往閱武家墩癸卯閱視溜淮套  
由清口登陸詳勘地勢御行宮門問張鵬翮曰尔何所  
見奏開溜淮套鵬翮對不称旨

上曰今日沿途閱看見所立標竿錯雜問尔時全然不知  
河工係尔專責此不留心何事方畱心乎鵬翮不能對免  
冠叩首上顧諸臣日前阿山等察看泗州水勢奏溜淮  
套地方另開一河出張福口可以分洩淮水免洪澤湖之  
異漲保高家堰之危險繪圖進呈昨日閱武家墩尙謂果  
如阿山等所奏今日乘騎從清口至曹家廟詳勘地勢甚



高難以開鑿成河亦不能直達清口與伊等進呈圖樣迥  
乎不同且所立標年多有在坟墓上者若依之開河不獨  
壞民田廬甚至毀民坟墓朕惟恐一夫不獲其所何忍發  
此無數枯骨耶數年來兩河平靜民生安樂何必多此一  
事先年靳輔所開中河凡遭運商民船隻避黃河一百八  
十里之險至今人追念之但所開尚因舊河疏濬今欲開  
溜淮套必至鑿山穿嶺不惟斷難成功卽或成功將來汎  
水泛溢不漫入洪澤湖必致衝決運河矣 九卿議阿山  
與張鵬翮等均溺職應革任

上諭大學工等日聞驗視漕淮套之時張鵬翮桑額皆謂  
不可開因阿山主議乃列名奏請命革阿山尙書任張鵬  
翮大所加宮保桑額降五級劉光美于準各降三級俱從  
寬留任

諭大學士馬齊等曰朕看南旺湖水分南分北用意迥異  
平常人朕深嘉其才馬齊奏曰挑水填芒稻河鮑家營諸  
工皆係

皇上指示超出南旺湖分水之上

上曰分水事屬創舉今所開之河由舊疏濬與創舉不同

張玉書云引汶水分南北流是當日老人白英建議其策原善今

皇上睿裁築御埧開引河俾淮水敵黃黃水趨海此萬世之利亦萬世之良法也

上曰明代淮黃與今迥別明代黃水勢強淮水勢弱故有倒灌之患今漸次修治淮強黃弱矣然與其開溜淮套無益之河不若將洪澤湖出水之處再行疏濬令其寬深使清水愈加暢流至蔣家埧天然埧一帶舊有河形宜更加挑濬使通運糧小河俾商民船隻皆可通行卽漕船亦可

挽運爲利不淺矣 湖廣巡撫劉殿衡疏言常平倉捐助  
米穀原以備賑湖北各屬自康熙三十一年停捐舊貯穀  
石遇歲連灾款支用已盡請照例捐補以備需用允之

甲辰自曹家廟回清口將所立開河標竿盡行撤去百姓  
踴躍歡欣 諭馬齊等曰天下事有益者自宜亟行無吝

斷不可輕舉譬如人身有病方可用藥餌針砭如無病之  
人或告以割肉可得延年斷無听從之理開河事亦類此  
是日江南百姓叩請臨幸允之 丁未駐蹕淮安府城

內 杭州兵民叩請巡幸浙江允之 庚戌泊揚州 三

月二日乙卯駐蹕江天寺

丙辰泊鎮江府原任大學士

張英迎駕清江浦賜

御書對聯世恩堂額

已未駐蹕

江寧府城副都統鄂克遜奏陳節次出兵事稱旨嘉獎擢

江寧將軍並令敘前戰功予騎都尉世職合所襲騎都尉

為三等輕車都尉 壬戌詣祭明太祖陵至大門下輦由

東門升殿

甲子自江寧登舟啓行

乙丑登陸

丙寅

抵鎮江登舟

已巳駐蹕蘇州府城內

丙子駐蹕松江

府城內

壬午

御舟泊嘉興府岳廟

四月中甲申駐蹕杭州

甲午登舟

汨仁和縣唐棲 丁酉駐蹕蘇州 庚子駐虎邱 乙巳

駐江天寺 五月甲寅渡黃河癸酉

上回暢春園諭吏部等曰朕屢念河防屢行親閱凡自昔河道之源流治河之得失按圖考績靡不周知粵從明季冠氛決黃灌汴而洪流橫溢歲久不治迄于本朝在河諸臣未能殫心修築以致康熙十四五年間黃淮交徹海口漸淤朕乃特命靳輔爲河道總督靳輔自受事以後斟酌時宜相度形勢興建隄埝廣疏引河排眾議而不撓竭精勤以自効于是淮黃故道次第修復而漕運大通其一切

經理之法具在雖嗣後河臣互有損益而規模措置不能易也至于開創中河避黃河一百八十里波濤之險因而漕輓安流商民利濟其有功于運道民生至大且遠朕每涖河干徧加諮訪沿淮居民感頌斬輔治績眾口如一久而不衰夫人臣有大建樹于國家者獎勵酬庸宜從優渥雖賜卹易名已循彝典尙應特予褒榮賁以殊恩其加贈太子太保子騎都尉世職用彰朝廷追念勲臣之典爲矢忠宜力者勸尋令其子治豫襲職淮再襲二次先是兵部尙書今世榮督閩時謂出洋大船易以藏盜奏定漁船

禁用雙桅商船飭令改造毋許樑頭過丈有八尺至是聞  
浙總督梁鴻疏言商船不許過丈慮其越出外洋城至爲  
匪然船大則商人之資本亦大不肯爲匪且不容無賴之  
人操駕自定例改造所費甚鉅皆畏縮遷延其現已改造  
者僅求合于丈有八尺之樑頭而船腹與底或仍如舊是  
有累于商而實無閑海洋机務

上命大學士等議弛其禁 六月陝西盜犯朱奎魏學吾  
行劫商州雒南等處拒捕傷兵逃匿山澤千總趙璉招降  
之 詔內閣學士二格偕左都御史巢可托往勘寔朱奎



等實因官兵四面圍困計窮出降與自首不同論斬決從

犯流徙寧古塔被脅百餘人俱免罪承審官未能得實各

分別降革

十月浙撫王元疏言奉命賑濟

時嘉等處雨杭少無收

查常平倉積粟無多請照山東例于常平倉開例捐納

上顧大學士等曰浙省被災州縣亦照江南著總漕桑額

會同該撫截留漕糧賑濟何必捐納

偏沅巡撫趙申秀

疏言漕運旂丁舊有耗增及行月銀米于起運前預行給

發經給事中戴嵩條奏俟歸次後始發以防虧缺部議通

行臣按湖南運道遠于江浙而無耗增獨恃行月銀米以

資飛輓今既扣存窮丁不能涉遠必致誤漕且抵逋後卽  
無虧缺而事後補給恐滋胥吏侵蝕請仍照例給發  
上是之著爲令 又疏言全楚延袤數千里介以洞庭之  
險教職以寒士銓除赴任率多踰限請就湖南北分省選  
授下部議行 又請以靖州屬屬關稅併入辰關征解  
以杜侵漁 又言營兵給餉每于正月支領時地丁尙未  
開征州縣挪移于一時不得不預征于平日官民交累請  
以隔歲餘存米石撥給兵餉並下戶部議行

上與大學士馬齊衡諭在廷諸學士爲不及昔年因追憶

哲勒肯爲學士時批本最速且以其草書敏捷咸稱飛手  
十一月以旱免江南浙江通省人丁額征銀六十九萬  
七千七百餘兩其安徽江蘇被災應征康熙四十七年田  
畝銀共二百九十七萬五千二百餘兩糧三十九萬二千  
餘石浙江應征康熙四十七年田畝銀九十六萬一千五  
百餘兩糧九萬六千餘石亦俱着免征

康熙四十七年正月先是湖廣鎮筸紅苗劫靖江營苗民  
爲官兵捕獲守備王應瑞訪知營所在遣兵八寨欲援以  
出苗民拘留之戕一卒總兵雷如私釋所獲苗民易兵以

歸事聞 命內閣學士二格往訊得實苗犯廖老宰等俱梟示雷如照故縱罪囚律革職枷責王應瑞擅動軍馬發邊遠充軍 三月廣東巡撫范時崇疏言粵東濱海各州縣倉穀久貯易于霉爛省城八旂官兵需糧甚多請將近省州縣存穀酌量多寡折米六萬石運省支用其該年派撥額米秋成征補間遇歲歉亦可動用賑濟下部議行 七月暹羅國王森列照拍廣拍馬噶陸坤司由提耶菩埃遣陪臣進貢 九月

上駐蹕布爾哈蘇台召諸王大臣文武官集行宮前命皇

太子允初跪

上垂涕諭其不法

祖德不遵誨諭每肆惡虐虐暴戾恣飢

諭畢痛哭撲地旋諭將允初拘執幽禁并親撰告祭

天地

太廟

社稷文廢斥之幽禁咸安宮 內閣學士宋大業祭告南

岳歸劾趙巾喬輕褻

御書下由喬回奏尋奏大業前奉使至衡密體無厭此次

入楚以南岳廟工餘銀札諭藩司董昭祚不必報部而  
以解部充餉爲辭以此捏詞誣劾疏入大業坐革職

一月以大阿哥

直郡王

允禔令蒙古喇嘛巴漢格隆咒詛廢

皇太子用術鎮壓革去王爵幽禁於其府內凡上三旗所  
分佐領盡撤回給與允禔

上命達爾漢親王額駙班第等與漢大臣會同詳議於諸  
阿哥中眾議誰屬皆曰此事關係甚大非人臣所當言內  
臣強之內大臣阿靈阿散秩大臣鄂倫岱尙書王鴻緒侍  
耶揆敘遂私相計議與諸大臣暗通消息將八阿哥三字

於帑交內侍轉奏

上諭八阿哥未更事近又罹罪且母家驕令再思之以廢  
皇太子病由魘魅至是治療已痊諭眾釋之 十二月吏  
部等察議原任內閣學士宋大業疏奏偏沅巡撫趙申喬  
輕褻 御書等款俱經趙申喬辯明應無庸議其趙申喬  
所奏宋大業兩次奉差湖南共得銀九千餘兩宋大業已  
經自認應革職杖流銀追入官趙申喬疏內首明餽銀應  
減罪二等革職擬徒得

旨趙申喬降五級留任宋大業從寬免其杖流餘依議

廣東巡撫范時崇疏言前耿逆之變隨臣父范承謨殉難者五十三人內生員嵇永仁王龍光儒士沈天成及臣族叔范承譜俱偕臣父幽囚三載殉難死節前撫臣楊熙題請贈銜部議以生員無追贈之例議遂寢臣仰祈

皇上特沛恩綸予以一命陪祀臣父祠堂以慰忠魂下部議尋議生員嵇永仁王龍光應追贈國子監助教沈天成范承譜雖庶民無追贈例但係死節應追贈國子監學政並入祠陪祀從之 湖廣總督郭世隆條奏防守紅苗三款一沿邊安設塘汛已經周密惟盛華哨起至鎮溪所十



帶山高箐密難于瞭望應酌撥鎮守兵八百各另設四營分駐每日派官一員帶兵五十名遊巡一舊日苗來內地名往苗叢每滋事端今以塘汛爲界北苗除納糧買賣外不得擅入塘汛之內民亦不得擅出塘汛之外一內地奸民與苗人結親至勾通爲惡嗣後如有前弊應離異從之貴州巡撫劉蔭樞疏言天下教官多至二千餘員每月選授不下數十員撫臣考試後按名具題章奏煩多請照佐貳雜職例陞遷叅革者俱咨部年終彙奏從之

東華錄卷之二十終